

阿毗曇毗婆沙論卷第四十八 東八

迦 旃 延 子 造

北涼沙門浮陀跋摩共道泰譯

使捷度一行品第二之五

問曰云何立六種阿羅漢耶答曰以根故問

曰根有九種上上至下下先說阿羅漢有六

種云何以根故阿羅漢有九種答曰或有說

者退法阿羅漢成就二種根下下中憶法

成就上下根護法成就中下根等住成就中

中根能進成就中上根不動成就上下根辟

支佛成就上中根佛成就上上根彼不應作

是說無有一人成就二種根者利根者尚不

能何況鈍根評曰應作是說退法阿羅漢成

就下下根憶法下中護法下上等住中下能

進中中不動有二種有從時解脫至不動有

性不動從時解脫至不動者中上本性不動

者上下辟支佛上中佛上上退法阿羅漢作

一事唯退憶法阿羅漢作二事退法憶法護

法阿羅漢作三事退法憶法護法等住阿羅

漢作四事退法憶法護法等住能進阿羅漢

作五事退法憶法護法等住能進復有說退

法阿羅漢有三事一退住學根二轉至勝根

三即住般涅槃憶法阿羅漢有四事一退住

學根二退住退法根三轉至勝根四即住般

涅槃護法阿羅漢有五事一退住學根二退

住退法根三退住憶法四轉至勝根五即住

般涅槃等住阿羅漢有六事一退住學根二

退住退法根三退住憶法四退住護法五轉

至勝根六即住般涅槃能進阿羅漢有七事

一退住學根二退住退法根三退住憶法四

退住護法五退住等住六轉至不動七即住
般涅槃問曰憶法阿羅漢退住學根爲得何
等學根爲得退法學根爲得憶法學根耶答
曰得退法學根非憶法學根所以者何彼未
曾得憶法學根故若得者是名爲進不名爲
退世尊經說尊者瞿曇迦是時解脫阿羅漢
六反退第七反還得時解脫身作證以刀自
害而死問曰彼尊者瞿曇迦爲是退法性爲
是憶法性若是退法性者何故以刀自害若
是憶法性者何故六反退耶答曰應作此論
是退法性問曰何故以刀自害答曰獸患退
故以刀自害若不退以刀自害者是憶法性
所可用道斷欲界結退彼道時還得彼結得
不耶答曰還得彼結得諸結得離欲時斷退
時還得彼結得所可用道斷色無色界結退

彼道時還得彼結得不耶答曰還得彼結得
諸結得離欲時斷退時還得彼結得問曰所
可用斷結道於彼道不退所可用退道彼道
不能斷結無礙道能斷結無有退無礙道者
住解脫道退無有以解脫道斷結者何故作
是說所可用道斷欲界結退彼道時還得彼
結得廣說如上答曰無礙道是解脫道因解
脫道是無礙道果若於果退時亦應言因退
復次煩惱以無礙道對治若成就彼煩惱時
亦當言退彼對治道復次以煩惱故立斷煩
惱無礙道若成就煩惱時亦當言退彼無礙
道尊者僧伽婆修說曰住無礙道退住解脫
道亦退所以者何斷五種結須陀洹退時彼
非是退五無礙道五解脫道耶評曰應作是
說無有住無礙道退退已住無礙道者退解

脫道還住解脫道

九斷智欲界繫苦集所斷結斷一斷智色無色界苦集所斷結斷二斷智欲界見滅所斷結斷三斷智色無色界見滅所斷結斷四斷智欲界見道所斷結斷五斷智色無色界見道所斷結斷六斷智五下分結斷七斷智色愛斷八斷智一切結斷九斷智問曰九斷智攝一切斷智一切斷智攝九斷智廣說如經本斷者是無爲問曰若斷者是無爲不能有緣何故彼斷是智耶答曰斷是智果故說智業果說業如說六入是舊業天眼天耳是通果說通阿羅漢是智果說智如是智果故說斷智問曰若然者修道所斷結以智斷故是智果可言斷智見道所斷結以忍斷是忍果云何言斷智耶答曰彼是世俗智果故言

斷智如先以世俗道離欲界欲乃至離無所有處欲八地中所斷結斷是世俗智果問曰若然者世俗道能有所作處可爾非想非非想處世俗道不能有所作非想非非想處見道所斷結斷是忍云何是斷智耶尊者僧伽婆修說曰此是慧果說斷智斷有二種一是慧果彼不應作是說所以者何佛經說二斷智一知智二斷智不說斷慧評曰應作是說實義智者是金剛喻定斷是彼果所以者何得阿羅漢果時以金剛喻定斷三界見道修道所斷結頓證解脫得故復有說者從智種中生故名斷智如瞿曇姓中生故名瞿曇彼亦如是復次彼斷性相是斷智彼斷雖不能有所緣而性相是斷智說名斷智如過去未來眼根雖不能見而性相是眼彼亦如是尊

者瞿沙說曰應言正斷是最勝斷相應斷畢
竟斷尊者波奢說曰應言棄斷所以者何棄
一切生死得此斷故此斷亦可言斷亦可言
無欲亦可言滅亦可言諦亦可言斷智亦可
言沙門果亦可言有餘涅槃界無餘涅槃界
苦法忍滅苦法智生是時彼斷名斷名無欲
名滅名諦不名斷智不名沙門果不名有餘
涅槃界無餘涅槃界苦比忍滅苦比智生是
時彼斷名斷乃至名諦不名斷智不名沙門
果不名有餘涅槃界無餘涅槃界集法忍滅集
法智生是時彼斷名斷名無欲名滅名諦名
斷智謂欲界見苦見集所斷結盡斷智不名
沙門果不名有餘涅槃界無餘涅槃界集比忍
滅集比智生是時彼斷名斷名無欲名滅名
諦名斷智謂色無色界見苦見集所斷結盡

東八

五

斷智不名沙門果不名有餘涅槃界無餘涅槃
界滅法忍滅滅法智生是時彼斷名斷名無
欲名滅名諦名斷智謂欲界見滅所斷結盡
斷智不名沙門果不名有餘涅槃界無餘涅槃
界滅比忍滅滅比智生是時彼斷名斷名無
欲名滅名諦名斷智謂色無色界見滅所斷
結盡斷智不名沙門果不名有餘涅槃界無餘
涅槃界道法忍滅道法智生是時彼斷名斷
名無欲名滅名諦名斷智謂欲界見道所斷
結盡斷智不名沙門果不名有餘涅槃界無餘
涅槃界道比忍滅道比智生是時彼斷名斷
名無欲名滅名諦名斷智謂色無色界見道
所斷結盡斷智名沙門果謂須陀洹果不名
有餘涅槃界無餘涅槃界是時三界見苦見集
見滅及欲界見道所斷結同一味頓證解脫

得是時彼斷名無欲名滅名諦名斷智
名沙門果謂須陀洹果不名有餘涅槃無餘
涅槃界須陀洹當得斯陀舍果斷一種結乃
至五種結是時彼斷名無欲名滅名諦
不名斷智不名沙門果不名有餘涅槃無餘
涅槃界第六無礙道滅第六解脫道生是時
彼斷名無欲名滅名諦不名斷智名沙
門果謂斯陀舍果不名有餘涅槃無餘涅槃
界是時三界見道所斷彼斷名無欲名
滅名諦名斷智謂先所得斷智名沙門果謂
斯陀舍果不名有餘涅槃無餘涅槃界欲界
修道所斷五種結同一味頓證解脫得是時
彼斷名無欲名滅名諦不名斷智名沙
門果謂斯陀舍果不名有餘涅槃無餘涅槃
界斯陀舍當得阿那舍果斷第七第八種結

東八

六

時彼斷名無欲名滅名諦不名斷智不
名沙門果不名有餘涅槃無餘涅槃界第九
無礙道滅第九解脫道生是時彼斷名無
欲名滅名諦名斷智謂五下分結盡斷智
名沙門果謂阿那舍果不名有餘涅槃無餘
涅槃界即彼時三界見道所斷結及欲界修
道所斷八種結同一味頓證解脫得是時彼
斷名無欲名滅名諦名斷智謂本得斷
智五下分結盡斷智名沙門果謂阿那舍果
不名有餘涅槃無餘涅槃界離初禪欲斷一
種結乃至斷九種結是時彼斷名無欲
名滅名諦不名斷智不名沙門果不名有餘
涅槃無餘涅槃界乃至離第四禪欲斷一種
結乃至斷八種結說亦如是第九無礙道滅
第九解脫道王是時彼斷名無欲名滅

名諦名斷智謂色愛斷斷智不名沙門果不
名有餘涅槃無餘涅槃界離空處欲乃至離
非想非非想處斷八種結是時彼斷名斷名
無欲名滅名諦不名斷智不名沙門果不名
有餘涅槃無餘涅槃界金剛喻定滅初盡智
生是時九種結斷彼斷名斷名無欲名滅名
諦名斷智謂一切結盡斷智名沙門果謂阿
羅漢果名有餘涅槃界不名無餘涅槃界即
彼時三界見道所斷八地修道所斷非想非
非想處修道所斷八種結同一味頓證解脫
得是時彼斷名斷名無欲名滅名諦名斷智
謂一切結盡斷智名沙門果謂阿羅漢果名
有餘涅槃界不名無餘涅槃界若阿羅漢陰
界入更不相續入無餘涅槃界是時彼斷名
斷名無欲名滅名諦名斷智謂所得斷智名

沙門果謂阿羅漢果不名有餘涅槃界名無
餘涅槃界問曰諸斷是無爲何以有時名斷
智有時不名斷智答曰爾時或有四事或有
五事者名斷智四事者一害俱因二俱繫得
解脫三得無漏解脫得四害非想非非想處
一切徧使五事者即上四事五未離於界見
道中有四事修道中有五事苦法忍滅苦法
智生是時不害俱因雖害見苦所斷不害見
集所斷不俱繫得解脫雖見苦所斷繫得解
脫見集所斷不得解脫雖得無漏解脫得不
害非想非非想處一切徧使是時唯有一事
無三事是故彼斷名斷不名斷智苦比忍滅
苦比智生是時不害俱因雖斷見苦所斷因
不害見集所斷因不斷俱繫雖斷見苦所斷
繫不斷見集所斷繫雖得無漏解脫得而不

畢竟害非想非非想處一切徧使是時唯有
二事無有二事故彼斷不名斷智集法忍滅
集法智生是時害俱因先害見苦所斷因今
害見集所斷因俱繫得解脫先見苦所斷得
解脫今見集所斷得解脫得無漏解脫得亦
害非想非非想處一切徧使是時得名斷智
集比忍滅集比智生是時害俱因先害見苦
所斷因今害見集所斷因俱繫得解脫先見
苦所斷繫得解脫今見集所斷繫得解脫得
無漏解脫得害非想非非想處一切徧使是
時具四事故彼斷名斷智滅法忍滅滅法智
生是時害俱因先害見苦見集所斷因今害
見滅所斷因俱繫得解脫先見苦見集所斷
繫得解脫今見滅所斷繫得解脫得無漏解
脫得害非想非非想處一切徧使是時具四

事故彼斷名斷智滅比忍滅滅比智生道法
忍滅道法智生道比忍滅道比智生說亦如
是如是則說見道斷智修道中有五事名斷
智離欲界一種欲乃至離八種欲是時不害
俱因雖斷八種因不斷下下因所以者何九
種結展轉為因故俱繫不得解脫雖八種繫
得解脫一種繫不得解脫所以者何九種結
展轉相繫故雖得無漏解脫得害非想非非
想處一切徧使而不永離界是時唯有二事
無三事是故彼斷不名斷智斷第九種結是
時害俱因先斷八種因今斷下下因俱繫得
解脫先八種繫得解脫今下下繫得解脫得
無漏解脫得害非想非非想處一切徧使畢
竟離界謂離欲界是時有五事故彼斷名斷
智離初禪欲斷一種結乃至斷八種結廣說

如欲界斷第九種時害俱因先斷八種因今
斷下下因俱繫得解脫先八種繫得解脫今
下下繫得解脫得無漏解脫得害非想非非
想處一切徧使而非畢竟離界是時唯有四
事無五事是故彼斷不名斷智第二第三禪
說亦如是離第四禪欲斷一種結乃至斷八
種結不害俱因俱繫不得解脫雖得無漏解
脫得害非想非非想處一切徧使而不畢竟
離界是時唯有二事無三事是故彼斷不名
斷智斷第九種結是時害俱因俱繫得解脫
得無漏解脫得害非想非非想處一切徧使
畢竟離界是時有五事故彼斷名斷智謂色
愛盡斷智如離初禪欲乃至離三禪欲離空
處欲乃至離無所有處欲說亦如是離非想
非非想處欲斷一種結乃至斷八種結時不

害俱因俱繫不得解脫雖得無漏解脫得害
非想非非想處一切徧使而不畢竟離界是
時唯有二事而無三事是故彼斷不名斷智
斷第九種結是時害俱因俱繫得解脫得無
漏解脫得害非想非非想處一切徧使畢竟
離界是時有五事故彼斷名斷智謂一切結
盡斷智問曰為離四禪修道所斷愛名斷智
為唯離第四禪修道所斷愛名斷智耶答曰
或有說離四禪愛名斷智復有說離第四禪
九種愛名斷智復有說唯離第四禪下下種
愛名斷智評曰應作是說離色界一切修道
所斷愛名斷智所以者何若離第四禪下下
愛色界一切修道所斷愛盡乃名斷智問曰
斷法是最勝法何故二斷得通證謂阿那含
阿羅漢果時答曰此二時畢竟離界亦得果

得須陀洹果斯陀含果是時雖得果不畢竟
離界離第四禪欲雖畢竟離界而非得果得
阿那含果時畢竟離界謂離欲界欲得果得
阿那含果得阿羅漢果時畢竟離界謂離無
色界得果得阿羅漢果時復次是時畢竟離
界斷下分上分結得須陀洹果斯陀含果時
不畢竟離界不斷下分上分結離色愛時雖
畢竟離界謂離色界不畢竟斷上分結得阿
那含果時畢竟離界謂離欲界畢竟斷下分
結得阿羅漢果時畢竟離界謂離無色界畢
竟斷上分結復次是時畢竟離界畢竟斷不
善無記煩惱得須陀洹果斯陀含果時不畢
竟離界亦不畢竟斷不善煩惱離色界時雖
畢竟離界不畢竟斷無記煩惱得阿那含果
時畢竟離界謂離欲界畢竟斷不善煩惱得

東八

十一

阿羅漢果時畢竟離界謂離無色界畢竟斷
無記煩惱如不善無記有報無報無生二果
一果無慚無愧相應無慚無愧不相當知
說亦如是九斷智誰捨幾誰得幾答曰或有
無捨無得者如凡夫人是也問曰此中不問
凡夫不應答凡夫復有聖人不捨不得者如
住本性者是也勝進者亦如是苦法忍滅苦
法智生是時捨不得苦比忍滅苦比智生
是時亦不捨不得集法忍滅集法智生是時
得一而無所捨集比忍滅集比智生是時得
一而無所捨滅法忍滅滅法智生是時得一
而無所捨滅比忍滅滅比智生是時得一而
無所捨道法忍滅道法智生是時得一而無
所捨道比忍滅道比智生若非離欲人得一
而無所捨若是離欲人捨五得一

謂道比智時所得斷是五下分結盡斷也聖人離欲界欲斷一種乃至八種結無得無捨斷第九種結是時捨六得一謂五下分結盡斷智是也離初禪欲斷一種乃至九種結無得無捨第二第三禪亦如是離第四禪欲斷一種乃至八種無得無捨斷第九種得一而無所捨如初禪二禪三禪空處識處無所有處亦如是離非想想非想想處欲斷一種乃至八種結亦無得無捨斷第九種時捨二得一謂一切結盡斷智是則說勝進時退時亦有捨有得阿羅漢起無色界煩惱退時捨一得二起色界煩惱退時捨一得一起欲界煩惱退時捨一得六離色愛阿那含起色界煩惱退時捨一而無所得起欲界煩惱退時捨二得六未離色愛阿那含起欲界煩惱退時捨

東八

十二

一得六退斯陀含果時無捨無得此九斷智幾是禪果幾是無色定果幾是根本禪果幾是禪邊果幾是根本無色定果幾是無色定邊果幾是見道果幾是修道果幾是忍果幾是智果幾是法智果幾是比智果幾是法智分果幾是比智分果幾是世俗道果幾是無漏道果幾是禪果者答曰九是禪及眷屬果幾是無色定果者答曰二是無色定及眷屬果幾是根本禪果者答曰阿毗曇者作如是說五是根本禪果尊者瞿沙作如是說八是根本禪果幾是禪邊果者答曰九謂未至依是也非餘禪邊幾是根本無色定果者答曰一幾是無色定邊果者答曰一謂空處邊非餘無色定邊幾是見道果者答曰六幾是修道果者答曰三幾是忍果應說如

見道幾是智果者應說如修道幾是法智果者答曰三幾是比智果者答曰二幾是法智分果者答曰六幾是比智分果者答曰五幾是世俗道果者答曰二幾是無漏道果者答曰九若離色愛得正決定色愛盡斷智何時得耶尊者僧伽婆修說曰道比智現在前時得所以者何道比智亦是向道亦是果道不應作是說住果而言是向彼未曾起一剎那頃向道現在前何故說言向道耶復有說若離空處欲是時於未來世修無漏禪是時得色愛盡斷智此說亦不應爾所以者何是時對治無色界禪未來修不對治色界禪修復有說當得阿羅漢果住金剛喻定三界見道修道所斷結同一味通證解脫得是時得色愛盡斷智評曰應作是說彼從果必起勝果

東八

十三

道現在前是時得色愛盡斷智若不從果更起勝果道現在前者離三禪欲人依下地得正決定彼若命終生四禪中若無色界彼不應成就樂根若然者則與十門所說相違如說誰成就樂根若生徧淨若聖人生徧淨上欲令無如是過故從果起必起勝果道現在前是時得色愛盡斷智九斷智攝一切斷智一切斷智攝九斷智耶答曰一切攝九非九攝一切九者如此中說一切者此九及諸餘斷是一切者多九者少一切斷智攝九斷智餘者猶多譬如大器覆於小器餘者猶多彼亦如是不攝何者答曰見諦具足世尊弟子未離欲者欲界繫修道所斷九斷智所不攝聖人離欲界欲時斷初種結乃至斷八種結此斷非九斷智所攝已離欲愛未離色愛色

界修道所斷結斷非九斷智所攝已斷色愛
乃至第四禪斷八種結彼斷非九斷智所攝
已離色愛未離無色愛無色界修道所斷結
非九斷智所攝離空處欲乃至斷非想非非
想處八種結彼斷非九斷智所攝問曰苦智

東八

十四

已生集智未生三界見苦所斷結斷彼斷非
九斷智所攝何故此中不說耶答曰應說此
文應如是說一切攝九非九攝一切不攝何
等答曰苦智已生集智未生三界見苦所斷
煩惱斷彼斷非九斷智所攝餘說如上而不
說者有何意耶答曰此中所說斷是有斷智
人斷彼雖是斷非是有斷智人斷問曰雖作
是說於義不盡所以者何不說凡夫人斷故
答曰此是略說現初入門故而作是說
八人向須陀洹果證人住須陀洹果向斯陀

舍果證人住斯陀舍果向阿那舍果證人住
阿那舍果向阿羅漢果證人住阿羅漢果問
曰人名有八實體有幾答曰阿毗曇者作如
是說人名有八實體有五須陀洹果證人向
阿羅漢果名有二實體有二須陀洹果向斯
陀舍果證人名有二實體有一斯陀舍果向
阿那舍果證人名有二實體有一阿那舍果
向阿羅漢果證人名有二實體有一尊者瞿
沙作如是說八人名有八實體有八彼作是
說須陀洹人住須陀洹果不勝進時名成就
須陀洹果人若勝進時名向斯陀舍果證人
捨須陀洹果斯陀舍人住斯陀舍果不勝進
時名成就斯陀舍果人若勝進時名向阿那
舍果證人捨斯陀舍果阿那舍人住阿那舍
果不勝進時名成就阿那舍果人若勝進時

東八

十五

名向阿羅漢果證人捨阿那含果所以者何以根故說人差別是故生智論作如是說向斯陀含果證人當言成就須陀洹果不耶答曰不成就乃至向阿羅漢果證人當言成就阿那含果不耶答曰不成就評曰八人名有八實體有五如是說者好如名體名數體數名差別體差別名異體異名別體別知名知

義當知亦如是問曰若八人名有八實體有五云何說八人差別耶答曰以行聖道故須陀洹若於須陀洹果不勝進時於須陀洹果名得名在身名成就名現前行若於須陀洹果勝進者是時住向於須陀洹果名得不在身中名成就不現前行於向名得名在身中名成就名現前行乃至若於阿那含果不勝進時於阿那含果名得名在身中名成就名

現前行若於阿那含果勝進者是時住向於阿那含果名得不在身中名成就不現前行於向名得名在身中名成就名現前行向須陀洹果證人於此九斷智成就幾不成就幾此中以人爲章以斷智爲門答曰或不成就或一二三四五廣說如經本

阿毗曇毗婆沙論卷第四十八

東八